

LIGJ
Nr. 25/2026

PËR DISA NDRYSHIME DHE SHTESA NË LIGJIN NR. 43/2023,
“PËR QEVERISJEN ELEKTRONIKE” , I NDRYSHUAR

Në mbështetje të neneve 78 dhe 81 të Kushtetutës së Republikës së Shqipërisë, me propozim të një deputeti,

KUVENDI
I REPUBLIKËS SË SHQIPËRISË

VENDOSI:

Në ligjin nr. 43/2023 “Për qeverisjen elektronike”, i ndryshuar, bëhen ndryshimet dhe shtesat e mëposhtme:

Neni 1

Në nenin 4 bëhet ndryshimi dhe shtesa si më poshtë:

1. Pika 21 shfuqizohet.
2. Pas pikës 47 shtohet pika 48 me këtë përmbajtje:

“48. “Shoqëri operatore TIK” është shoqëri aksionere, ku shteti zotëron të paktën 51 për qind të aksioneve për zhvillimin, administrimin dhe mirëmbajtjen e sistemeve, platformave dhe infrastrukturave të ofrimit të shërbimeve elektronike.”.

Neni 2

Në nenin 12 pas paragrafit të parë shtohen paragrafët me këtë përmbajtje:

“Në çdo rast të përpunimit të të dhënave personale ndërmerren dhe zbatohen masat e duhura teknike dhe organizative, duke garantuar një nivel sigurie të përshtatshëm ndaj rrezikut, sipas parashikimeve të legjislacionit në fuqi për mbrojtjen e të dhënave personale.

Çdo veprim përpunimi i të dhënave personale gjatë aksesit/ndërveprimit me bazat e të dhënave shtetërore realizohet në përputhje me legjislacionin specifik dhe legjislacionin në fuqi për mbrojtjen e të dhënave personale.

Rolet mbi kontrollin dhe përpunimin e të dhënave personale do të përcaktohen me vendim të Këshillit të Ministrave në zbatim të këtij ligji.”.

Neni 3

Në nenin 22, pika 4, pas togfjalëshit “urdhër të Kryeministrit” shtohet togfjalëshi “apo ministrit përgjegjës për qeverisjen elektronike.”.

Neni 4

Në nenin 23 bëhen këto ndryshime dhe shtesa:

1. Fjalja e parë, e pikës 1, ndryshohet si më poshtë:

“AKSHI është institucion i administratës shtetërore, me statusin e personit juridik publik buxhetor me seli në Tiranë, në varësi të Kryeministrit apo ministrit përgjegjës për qeverisjen elektronike, sipas përcaktimit me vendim të Këshillit të Ministrave.”.

2. Në fund të pikës 1 shtohet fjalia me këtë përmbajtje:

“AKSHI mund të themelojë “Shoqëri Operatore TIK” sipas parashikimeve të këtij ligji.”.

3. Në pikën 2 fjala “Kryeministria” hiqet.

Neni 5

Në nenin 24, pas pikës 1 shtohet pika 1/1 me këtë përmbajtje:

“1/1. Për ushtrimin e funksioneve operative të zhvillimit, administrimit dhe mirëmbajtjes së sistemeve TIK, AKSHI mund të krijojë, të marrë pjesë ose të bashkëpunojë me shoqëri aksionere ku shteti zotëron të paktën 51 përqind të aksioneve, si dhe t’u kalojë atyre në administrim sisteme, platforma ose infrastruktura TIK dhe/ose t’i ngarkojë për zhvillimin dhe operimin e tyre nga fillimi.

Në çdo rast, kompetencat rregullatore, autoriteti publik dhe përgjegjësia institucionale mbeten tek AKSHI.”.

Neni 6

Në nenin 25, pika 1, shkronja “b” ndryshohet si më poshtë:

“b) ofron shërbime të përqendruara të teknologjisë së informacionit dhe komunikimit për institucionet dhe organet e administratës shtetërore nën përgjegjësinë e Këshillit të Ministrave, si edhe për institucione të tjera publike, me kërkesë të vetë institucionit, drejtpërdrejt ose nëpërmjet shoqërive operatore TIK , sipas legjislacionit në fuqi.”.

Neni 7

Në nenin 26, pas shkronjës “j” shtohet shkronja “k” me këtë përmbajtje:

“k) ushtrimi i detyrave të parashikuara në shkronjat “c”, “d”, “dh”, “f” dhe “g” të këtij neni mund të realizohet nga AKSHI, drejtpërdrejt ose nëpërmjet shoqërive operatore TIK në përputhje me këtë ligj.

Në çdo rast autoriteti rregullator, përgjegjësia institucionale, si dhe pronësia mbi sistemet, infrastrukturën, kodin burimor dhe të dhënat mbeten te shteti dhe administrohen nga AKSHI.”.

Neni 8

Pas nenit 26 shtohet neni 26/1 me këtë përmbajtje:

“Neni 26/1

Kalimi në administrim i sistemeve dhe infrastrukturave TIK

Me vendim të Këshillit të Ministrave, me propozim të AKSHI-t, sisteme, platforma ose infrastruktura TIK ose pjesë të tyre mund t’u kalohen në administrim shoqërive operatore TIK për qëllime zhvillimi, operimi ose mirëmbajtjeje.

Kalimi në administrim nuk sjell transferim të pronësisë mbi këto sisteme dhe infrastruktura.”.

Neni 9

Në nenin 29 bëhen ndryshimet dhe shtesat si më poshtë:

1. Shkronjat “dh”, “e” dhe “ë” shfuqizohen.

2. Pas shkronjës “h” shtohet shkronja “i” me këtë përmbajtje:

“i) i propozon Këshillit të Ministrave kalimin në administrim për qëllim zhvillimi, operimi apo mirëmbajtjeje të infrastrukturës së ofrimit të shërbimeve elektronike tek “Shoqëria Operatore TIK”.”.

3. Pas shkronjës “i” shtohet shkronja “j” me këtë përmbajtje:

“j) procedurat e prokurimit publik, përfshirë ato në fushën e teknologjisë së informacionit dhe komunikimit (TIK), zhvillohen në përputhje me parashikimet e legjislacionit në fuqi për prokurimin publik dhe prokurimit në fushën e mbrojtjes dhe sigurisë.”.

Neni 10

Në nenin 32, pika 1, në fjalinë e parë pas togfjalëshit “me urdhër të Kryeministrit” shtohet togfjalëshi “apo ministrit përgjegjës për qeverisjen elektronike”.

Neni 11

Në nenin 33, në pikën 4, pas togfjalëshit “nga Kryeministri” shtohet togfjalëshi “apo ministri përgjegjës për qeverisjen elektronike”.

Neni 12

Në nenin 34, në fund të fjalisë së parë shtohet shprehja “në masën deri në 800 000 (tetëqind mijë) lekë në muaj.”.

Neni 13

Në nenin 36 shtohet pika 3 me këtë përmbajtje:

“3. Pagesat që institucionet publike përfituese kryejnë ndaj shoqërive operatore TIK, në bazë kontratash shërbimi, nuk përbëjnë tarifa publike dhe rregullohen me vendim të Këshillit të Ministrave.”.

Neni 14

Dispozita kalimtare

Procedurat e prokurimit të nisura përpara hyrjes në fuqi të këtij ligji do të vijojnë të realizohen sipas parashikimeve të ligjit në fuqi në momentin e fillimit/nisjes së tyre.

Neni 15

Ngarkohet Këshilli i Ministrave që, brenda 3 muajve nga hyrja në fuqi e këtij ligji, të rishikojë dhe, sipas rastit, të përshtatë aktet nënligjore në fuqi për zbatimin e tij.

Neni 16

Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

Miratuar në datën 20.2.2026.

Shpallur me dekretin nr. 140, datë 12.3.2026, të Presidentit të Republikës së Shqipërisë, Bajram Begaj.